

24. oktoobri 2024

Valmis omma' filmi' VI Umast Pidost

VI Uma Pido pääkontsõrdi salvõstust näüdatäs riidi, 8. novembril kell 18 Põlva kultuurikeskusõn. Filmi 1. juunil Põlva Indsikurmun peetüst võrokiilsest laulupidost om kokko säädnü režissõör Tauno Uibo.

Filmiõdakul Põlvan tege väiku tagasikaehusõ pidolõ lavastaja Diana Leesalu ja laulu avitas üles võtta' pido päädiregent Küllike Joosing. „Seo om pido otsi kokkoköütmine ja lämmi vahtsõst kokkosaaminõ Uma Pido sõpruga,“ üteli VI Uma Pido kõrraldaja Merike Tigas. Kõik omma' oodõdu, üteliõmine om massulda.

Kiä taht pito miilde tulõta' ja filmi päält hinnäst ja ummi tutviti-sõpru üles otsi', saa Uma Pido pääkontsõrdi kinoekraani päält kaia' ka **Võrol kultuurimajan Kannel 10. novembril kell 15.30.** Pilet 5 eurot paigapääl.

Eräle om tettü viil film „Inne ja pääle Uma Pido pääkontsõrdi“, miä tutvustas Umma Pito nii ülesastjidõ ku ka päältkaejidõ mõttidõ kaudu. „Neo olli' herksä' silmäpilgu', ku üle pika ao sai jälki kokko suur hulk võrokiilsi inemiisi. Kõik seo lavastus pandsõ inemiisi inämb võro keele pääle mõtlõma ja inämb võro kiilt kõnõlõma. Sai kuulda' vahvaid ütlemiisi nii laulmisõ ku ka pidopidämise kotsilõ,“ võtsõ filmi jõudnu tundõ' kokko pidoliisi küsütelejä ja filmi toimõndaja Elo Rahman.

Kattõ Umast Pidos tettüt filmi saa edespite kaia' ka Uma Pido Youtube'i kanali päält:

- edimäne film „Uma Pido pääkontsõrdi“ and täüspika ülekaehusõ Uma Pido pääkontsõrdist;
- tõnõ film „Inne ja pääle Uma Pido pääkontsõrdi“ näütäs üteli intervjuudõga kibõnit tuust, miä sündü inne ja pääle pito Põlva liinan ja Indsikurmun.

Filme tegemist tugõsi Põlvamaa Partnõrluskogo Leader-programmist.

Uma Pido om võrokiilne laulu- ja rahvapido, miä oll' edimäst kõrda 2008. aastal Võrol. Parhilla om sälatakan kuus pito, miä omma' olnu vaeldumiisi Võrol ja Põlvan. Seo om innekkõkkõ Vana-Võromaa rahva, a niisama võrokõisi naabridõ ja sõpru pido, miä avitas hoita' võro kiilt ja Vana-Võromaa katsa kihlkunna ummamuudu olõmist, üteliõdsi tunda' häädmiilt võrokõisi kuraasist ja ilmanägemisest.

Lisateedüs:

Merike Tigas

Uma Pido projektijuht

tel 5691 6280

merike.tigas@wi.ee

Uma Pido kodoleht: www.umapido.ee

Uma Pido FBs: <https://www.facebook.com/umapido5/>

